



UNIVERSITÄTS-
BIBLIOTHEK
PADERBORN

Sacerdos Aut Sanctus Aut Reprobus

Dufrène, Maximilian

Augustæ Vindelicorum, 1743

Ad Lectorem.

[urn:nbn:de:hbz:466:1-60483](https://nbn-resolving.org/urn:nbn:de:hbz:466:1-60483)



Ad Lectorem.

CUM Tridui Riedöschingani materiam inspicias, Lector benevole, quænam sit hujus Tridui ratio ac methodus, intelligere procul dubio avebis. Piæ curiositati ut satisfaciam, breviter expono singula, quæ non ingrata tibi fore judicavero. Est Riedöschinga Ditionis Möskircho - Fürstenbergicæ Pagus Villingam inter & Schaffusium. Parochiæ illius Rector Zelosissimus ædes Parochianas ita suis impensis adaptavit, ut facilè triginta Venerabiles Confratres admittant, Triduum renovando spiritui daturos: Cellulas & cubicula totidem eapropter distinxit, quæ & necessaria suppellectili liberaliter instruxit. Confluunt huc è tota latè vicinia, quin etiam è locis remotioribus Dominici Gregis Pastores ferventissimi, quos omnes velut hospites gratissimos tectò & mensâ lætus excipit Tridui Fundator, Plurimum Reverendus Dominus Frobenius, Ferdinandus Tomsin, Parochus Riedöschinganus, & Ven. Capituli Engensis Deputatus ac Senior, qui honoris & gratitudinis ergò hîc nominari debuit,

Cùm

Cum tempus adest Tridui, per literas diu antè promulgati, quod in æstatem plerumque incidit, adsunt pariter Sacerdotum lectissimorum manipuli, nullis aut viarum, aut tempestatis sæpiùs adversæ incommodis absterriti. Singulis diebus, quos completitur Secessus, circa horam quartam matutinam incipiunt celebrari sacra, ad quæ confertus è tota vicinia populus concurrit, ut in maximis Solemnitatibus fieri assolet. Horâ octavâ cum cantu in Hierotheca majore exponitur Venerabile Sacramentum, exclusóque post Benedictionem populo, sacris commentationibus datur initium, quæ usque ad decimam producuntur, quod idem fit post prandium ab hora secunda ad quartam pomeridianam. Ordinumur semper à lectione sacra, quam excipit vel consideratio, vel æquivalens examen statûs: sequitur meditatio, cui semper subjungitur pia in silentio materiæ propositæ per horæ circiter quadrantem ruminatio. Claudit demum utriusque mediæ diei exercitia Sacra cum Cantu Benedictio.

Circa horam undecimam sumitur prandium, & sub sextam vespertinam cœna, quo toto tempore ex idoneo Auctore pia præleguntur: post utramque autem refectionem bini ad templum transeunt omnes, psalmum quinquagesimum alta voce recitantes, fusisque ibi per tempus aliquod precibus, colloquium instituitur, sub meridiem usque ad ho-

ram primam; Vesperi ad octavam, quod materias morales, asceticas, polemicas, Ecclesiastico Historicas &c. ventilando, non hilariter minùs, quàm piè ac doctè transmittitur. Horâ octavâ instituitur examen conscientiaë, & publicè dicuntur preces vesperinaë. Tempora autem vacua interdium aut horis recitandis, aut sacraë lectioni, vel scriptioni deputantur. Die ultima totum Triduum cantato solemniter Hymno Ambrosiano clauditur, quo finito alacres ad sua redeunt strenui in Vineam Domini Operarij, ultrò fatentes, plurimùm sibi novarum virium ad resumendos labores muneri suo proprios à secessu hoc triduoano semper accedere. Tu nunc, amice lector, quæ hoc anno tractavimus, ad verbum hîc conscripta, benigno oculo perlustra, & Vale.



Ingres-



Ingressus ad Sacrum Triduum.

Adestis & hoc iterum anno, sacerdotes sancti! (patebit hoc triduum, quàm verè vos isto nomine compellem) Adestis, inquam, à dilecto gregetantis per avulsi, ut in sancto hoc secessu pro more vestro quiescatis paululum. Saluto igitur vos, Domini mei, in Visceribus JESU CHRISTI Dilectissimi ac Desideratissimi! Lætus vos iterum video congregatos hîc in Domino, qui suâ gratiâ, suo favore, sua singulari benedictione stat in medio Vestrûm. Habetis faventem Dominum, servi fideles, Pastores vigilantissimi, utpote qui fervore nunquam satis commendando huc per singulos annos convenitis ad audiendum, quid in Sanctis Meditationibus vestris loquatur in vobis Dominus DEUS. Sedete igitur hîc modicum & quiescite sub umbra DEI Eucharistici, quem pro more expositum humillimè adoramus; scopum porro, ac ordinem Tridui nostri consuetâ benevolentiam percipite.

Sacerdotum quilibet aut fervens est, aut tepidus: si fervens est, sanctum absque ulla hæsitacione dicamus; si tepidus est, inter reprobos illum

au.

audaciter numeremus. Tanti ergo nostram
omnium interest fervorem spiritus constanter
alere, quanti facienda singulis æterna
salus, & statui Sacerdotali annexa Sanctitas,
sine qua nulla nobis speranda salus.
Quare Scopus Tridui nostri alius non est,
quàm beati fervoris continuo alendi studium
indefessum, & arcendi teporis cura per-
vigil. Hunc verò scopum quò certius asse-
quamur, una ex parte Sacerdotem eximie
ferventem; altera ex parte insigniter tepidum
contemplamur, ut contraria juxta se
posita magis elucescant, nosque ad Sanctum
fervorem hinc potenter stimulemur; istinc à
damnabili reproborum tepiditate quàm longissimè
& efficaciter abstrahamur. Huc quidem
Considerationes ac Meditationes singulæ
collineabunt. Lectio autem spiritualis
remedium suggeret uti suavissimum, ita &
potentissimum, quo adjuti seduloque usi à
fervore felicissimo nunquam certè discedemus,
neque ad infaustum teporem unquam accedemus:
remedium simplex & unicum, sed præstantissimum,
& jucundissimum, uti paulò post ad oculum
patebit. Divini Spiritus lumen & sanctos
ardores suppliciter petimus, indeque ad ipsum
mox initium transimus. *Veni Sancte Spiritus.*

Sylla.